



Inatsisartunut ilaasortaq Hans Enoksen, Siumut  
MAANI

**Naalakkersuisunut apeqqummut nr. 85-imut akissut illoqarfinni nunaqarfinnilu puisit amiinik tunisisinnaanernut periarfissat pillugit.**

Inatsisartut suleriaasiat § 37, imm. 1 naapertorlugu illoqarfinni nunaqarfinnilu puisit amiinik tunisisinnaanernut periarfissat pillugit Naalakkersuisunut apeqquteqaateqarsimavutit. Apeqquteqaat uanga susassaqarfinni akisassanngorlugu innersuunneqarpoq.

14. apr 2011  
Sagsnr. 2011-048477  
Dok. Nr. 607223

Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

**1) Illoqarfinni nunaqarfinnilu amerlasuuni puisit amiinik tuniseqqusiunnaarneq Naalakkersuisunit allanngortinniarneqarpaa?**

1 pillugu) Apeqqutit naatsumik akillugu, naagga.

Namminersorlutik Oqartussat juni 2010-mi suleqatigiissitamik pilersitsipput Namminersorlutik Oqartussanit, Great Greenland A/S-imit (GG A/S) KNAPK-millu ilaaffigineqartoq. Tunisinermi killilersuisoqartillugu qanoq ingerlariaaseqartoqassanersoq suleqatigiissitaq siunnersuuteqarsimavoq. Suleqatigiissitap innersuussutai *Great Greenland A/S-ip siunissaa pillugu nassuiaat*-mi, februar 2011-meersumi atuarneqarsinnaapput. Nassuiaat [www.nanoq.gl-imi](http://www.nanoq.gl-imi) APNN – Saqqummersitat ataani aaneqarsinnaavoq. 5. februar 2011 Inatsisartut Aalisarnermut, Piniarnermut Nunalerinermullu ataatsimiitsitaliaannut oqaasiinnakkut ilisimatitsissutigisimasara ilanngullugu innersuussutigissavara.

Puisit amiinik killeqanngitsumik tunisisinnaaneq isumaqarpoq amminik 90-100.000-inik tunisineq. 2011-imi puisit amiinik 60.000-iinnarnik tunisinissamut tapiissuteqarsimanera pissutigalugu tunisinerup killilersorneqarnissaa pisariaqarpoq. Amminik saniatigut 10.000-inik tunisisoqarnerani 4 mio. kr.-inik akeqassaaq.

Aalisarnermut Piniarnermut Nunalerinermullu Naalakkersuisoqarfiup (APNN) GG A/S-illu akornanni puisit amiinik tunisinermi 2011-mut tapiissutit pillugit kiffartuussinermik isumaqatigiissummi nassuiaammi innersuussutit tunngavigineqarput. Ulluni makkunani aningaasatigut sukangasuumik ingerlatsisariaqarnerup nalaani killeqanngitsumik tapiissuteqartarneq akuerineqarsinnaanngilaq. Aningaasanut Inatsimmi konto-p 51.02.03-p ataani, nunap ilaani sumiiffiit tapiissutinik iluaqutaaffiusinnaanerpaat qinertarnissaat pisariaqarpoq, takuuk konto-mut pineqartumut nassuiaatit.

Nassuiaatip innersuussutaasa ilaat, Kalaallit Nunaanni illoqarfinni nunaqarfinnilu sorlerni amminut tunisinissamut tapiissutit sunniuteqarnerpaasinnaanerannik misissuisimanernik

tunngaveqarpoq. Taamaattumik sumiiffiit aningaasatigut ajornartorsiornerpaat suli tunitsivigineqartarnissaat Naalakkersuisut qinersimavaat.

Puisit amminik tunisinerup saniatigut aningaasarsiorsinnaaneq, Kalaallit Nunaanni sumiiffiit ilaanni annikipput. Piniartut aalisartullu illoqarfinni nunaqarfinnilu pineqartuni ukiumut aningaasatigut isertitaatigut tamanna takuneqarsinnaavoq. Assersuutitut taasinnaavagut qaleraleqarfiit, avannaani puisit amiinik tunitsiviunngitsut pitsaanerusumik aningaasarsiorfiusut.

- Uummannaq assersuutigineqarsinnaavoq, tassani piniartut agguaqatigiissillugu ukiumut 200.807,- kr.-nik isertitaqartarput, tassanilu puisit tunineqarnerat aqutugalugu agguaqatigiissillugu isertitat 7.007,- kr.-niullutik. Tassani puisit amiinik tunisisarneq piniartunut pingaaruteqarnera annikinnerooq, taamaattumik tassani puisit amiinik tunisisinnaaneq matuvoq.
- Qassimiut aappaattut assersuutigissavarput, tassani piniartut agguaqatigiissillugu 211.870 kr.-ninik isertitaqartarput, puisit tunineranni agguaqatigiissillugu 88.679 kr.-niullutik. Sumiiffimmi tassani puisit amiisa tunineqarnerat piniartunut pingaaruteqartorujussuavoq, taamaattumillu tassani puisit amiinik tunisisinnaaneq ammaannarluni.

Ilisimavara tunisisinnaanerup pingaarutaa sumiiffinni assigiinngitsuni assigiinngitsuusoq, aningaasalli atorineqartussat killeqarmata killigittat ersarissut pisariaqarput, aningaasaliissutaasut ukioq naallugu naammassappata pisariaqartitsinerpaanut ingerlanneqarlutik.

## **2) Tassami nunaqarfippassuarni illoqarfinnilu aalisartut piniartullu puisit amiinik tunisaqarsinnaajunnaarnertik inuuniarnermikkut ilungersunartorsiutigaat. Tuniseqqissinnaalernissaat ammaanniarneqarjaa?**

2 pillugu) Piniartut aalisartullu aningaasaqarnerat puisit amiinik tunisinissamut matoqqasuni ammaanikkut iluarsineqarsinnaangilaq. Tunisinissamut killilersuinerit kinguartinneqassagaluarpat ajornartorsiutit ukiup ingerlanerani kingusinnerusukkut ajorneruliinnassapput. Taamaalissagaluarpat illoqarfiit nunaqarfiillu amerlanerit tunisiffigeqqusaajunnaassapput, ukiup ingerlanerani siusinnerusukkut aningaasaliissutit amerlanerpaartaat atorineqareersimassammata. Taamaattumik Naalakkersuisut aalajangigaat attatiinnarpakka.

Pisortat suliffeqarfiisa kalaallit nerisassaataannik pisinerusalernissaat Naalakkersuisut siunertaraat. Aalisartuniit piniartuniillu pisinerulernermi assigisaanik isertitat qaffassavaat. Maanna 260 mio. kr.-nit nalinganik eqqussisoqartarpoq, kisianni taanna kalaaliminertulernerunikkut affaannangortinneqarsinnaavoq. Tassa imaappoq kalaallit piniartuisa namminneq kaaviaartitaat 130 mio. kr.-ninnorsinnaapput, taakkulu kiffartuussinermik isumaqatigiissutigineqarsimasunit 25,2 mio. kr.-niusunit 5-riaammik amerlanerupput.

GG A/S-ip nunatsinni tunisaat ukiuni kingullerni amerlipput (49% 2009-mi). GG A/S-ip puisit amii aallaavigalugit allanik nutaanik isertitsissutigisinnaasaminik, namminerlu ineriartortitamini ujarlenera Naalakkersuisut tapersorsorpaat. Taamaalillutalu neriusaagut suinissami ququguussagaluarnersoq nuna tamakkerlugu puisit amiinik

killeqanngitsumik tunisisinnaalerumaarluta. Naalakkersuisut suliniutit suliffissanik nutaanik pilersitsisut isertitaqartitsinerulersullu tamaasa tikilluaquai, pisortanit namminersortunilluunniit pisuuneri apeqqutaatinnagit.

Tamanit neriutigineqarpoq tapiissutinik pisariaqartitsineq milliartussasoq iluarsiissutit allat isertitaqaataasinnaasullu allat amerliartorneri ilutigalugu. Ilinniartitaanermi suliniutit ingerlateqqitat ineriartortitallu aqcutigalugit aamma Naalakkersuisut neriupput pisuussutinik uumassusilinnik atuneq annertoq ukiut ingerlaneranni oqimaaqatigiinnerulerumaartoq.

Naggataagut kaammattuerusuppunga tamanut atuutsitsilluni oqaluttoqarpallaaqqunagu, piniartummi ilaquataallu tamarmik allannguutaasimasunit eqqugaanngimmata. Tapiissutit Inatsisartunit immikkoortinneqarsimasut pisariaqartitsinerpaanut atorineqarnissaat ujjartorneqarmat.

Inussiarnersumik Inuulluaqqusillunga

Ane Hansen